

EUROPAKO BATASUNA. Delitu ekonomikoak zerrendatik kanpo uzteko eskatu zuela ziotenak salatu ditu Berlusconi

Atxilotze eta entrega agindu europarra sinatzea onartu du Italiako Gobernuak

Horren truke, Italiako Konstituzioan egin beharreko aldaketak aintzat hartu beharko ditu EBk

Agentziak | **ERROMA**

Silvio Berlusconi Italiako lehen ministroak Europako Batasunak (EB) abian jarri nahi duen atxilotze eta entrega agindu europarra sinatzea onartu zuen atzo, Guy Verhofstadt Belgikako lehen ministro eta Europako Batasuneko Kontseiluko lehendakariarekin Erroman bildu ostean. Euroaginduari babesa ematearen truke, ekimen hori abian jarri aurretik Europako Batasunak Italiako Konstituzioan egin beharreko zenbait aldaketa aintzat hartuko dituela hitzartu zuen Berlusconi Verhofstadtekin.

Italiako lehen ministroa atxilotze eta entrega agindu europarra sinatzearen aurka agertu zen joan den abenduaren 6an Bruselan (Belgika) Europako Batasuneko Justizia eta Barne ministroen Kontseiluak eginiko goi bileran, haren gobernuak ez baitzuen onartzen iruzurra eta ustelkeria politikoa Europako Batasunak osatu nahi duen delituen zerrendan sartzea.

Berlusconi azpimarratu zuenez, «Italiako Gobernuak atxilotze eta entrega agindu europarra onartzen du. Hala ere, akordio horrek aintzat hartu beharko ditu barne zuzenbideko prozeduretan egin beharreko aldaketak, horiek arau berriei bateragarriak izan daitezkeen».

Konstituzioan egin beharreko aldaketen ardura, aldiz, Italiako Legebiltzarrari dagokiola esan zuen Berlusconi —Italiako le-



PLINIO LEPRI / AP

Silvio Berlusconi Italiako lehen ministroa eta Guy Verhofstadt EBko Kontseiluko lehendakaria, atzo.

hen ministroak gehiengoa du bertan—, «Gobernuak ez duela horren inguruko agindurik jaso, eta botere lejislatiboari dagokiolako aldaketa horiek egiteko ardura».

Italiako Gobernuak buruak, halaber, nabarmendu zuen berak inoiz ez duela eskatu delitu ekonomikoak Europako Batasunak osatu nahi duen delitu zerrendatik kanpo uztea. «Hori esan dutenak gezurra diote»,

gaineratu zuen Silvio Berlusconi.

Pique: «Euroagindua, Italiaren adostasunarekin edo gabe»

Italiako lehen ministro Silvio Berlusconi atxilotze eta entrega agindu europarra sinatzea onartu aurretik, Josep Pique Espainiako Gobernuak Atzerri ministroak adierazi zuen ostiral eta larunbat honetan Europako Batasuneko Estatu eta Gober-

nu buruek Laeken (Belgika) egingo duten goi bileran Italiako Gobernuak euroagindua onartzen ez bazuen ere ekimen hori aurrera aterako zela, EBko beste 14 kidek horren inguruan adostasun osoa lortu baitzuten Bruselako goi bileran.

Bestalde, Espainiako Legebiltzarreko Kanpo Arazoetarako Batzordeak aho batez onartu zuen atzo Nazio Batuen Erakundeak (NBE) 1999ko aben-

duaren 9an bultzatutako terrorismoaren aurkako ebazpena.

1373 gisa ezaguna den ebazpenak hainbat neurri exijitzen dizkie Nazio Batuen Erakundeak osatzen duten 169 kideei nazioarteko terrorismo sareei aurre egiteko: *terrorismo ekintzak* prestatzeaz edo laguntzeaz susmagarri diren pertsona edo erakundeei sostengu mota guztiak kentzeko xedapena, besteak beste.

EAJ

«Iragarritako porrot baten kronika»

Europako Batasunak abian jarri nahi duen atxilotze eta entrega agindu europarra «iragarritako porrot baten kronika» dela azpimarratu zuen atzo Emilio Olabarria EAJko legebiltzarkideak. Olabarriaren aburuz, «Italiarekin iruzur delituen inguruan gertatu dena beste herrialdeekin ere gertatuko da». Hala, Espainiako Konstituzioako terrorismoaren apologiaren kasua aipatu zuen Olabarriak.

Olabarriak adierazi zuenez, «EBk haxe egin behar zuen: Europa osoko zigor esparru bat eratu, estatu bakar batean jazartzen zailak diren zenbait delitu eta nazioz gaindiko kriminaltasun elementuak jazarri ahal izateko». Halaber, Olabarriak esan zuen «zentzuzkoa» dela alor guztietan esparru europarrak eratzea, baina horretarako legedi guztiak batu behar direla. «Hori egin ezean, neurri horiek porrot egingo dute», gaineratu zuen.

Bihar

barkatu
aina

Egunkaria



**'The lord of the rings',
irudimenetik irudira**

**Iban Aranzabalen proiektu berria: Internet bidez
euskal musika taldeak sustatzea**

**4 itzal: «Gurea musika gogorra da, ez dugu uste
beste etiketarik duenik»**

**Azken portuko tabernan, Ekaitz Goikoetxea
...zure independentzia**

